

YONI 'INA 'ETOLADI 'EBWEUNA

**Yoni 'ina leta gete solanaya
'iemwasala oboboma be
maedana be yawasi ataya
Yesu 'enega manudi.**

Ona nina yawasida manuna

1 ¹⁻² ^a ^b Gimi tutaya ona nina yawasida manuna Tamada ma'iyana simiyami, 'enega 'abo'ama wate tenamega 'anonona, ta wate nimamega tai nina 'agitoona, manuna ni'atu 'iapwesama ta matamega 'a'itena, ga tauna manuna 'asimasimana 'emiya, nate tauna yawasi ataya 'alena, ta lowa tauna Tamana ma'iyana simiyamiya, ni'atu 'iapwesama 'emaya.

³ Tauna 'a'itena ta 'anonona ga 'emiya 'asimanena be 'aene 'omi ma'emao taegosigosiyana leleleya, ta wate Tamada be Natuna Yesu Keliso ma'edao taegosigosiyana leleleya. ⁴ 'Enega 'imi leta gete ni'atu 'a'etoladinawa, be 'enega wada sawa, be wada gwausowala 'ai'aila.

Yaubada maedana 'alena

⁵ ^c 'Enega tetela gete 'ieonema, ga 'asimanena 'emiya 'aene Yaubada maedana 'alena, ta nigeya wate 'ebweu guguyoi 'enaya 'imiyami.

⁶ ^d 'Enega 'abo sena guguyoi 'enaya tamiyami, geya'abo takabokabo be tagwae 'aene, “Yaubada ma'edai taegosiyana.” Nate nigeya bubuna palupaluna. ⁷ Ta 'eguma sena maedana 'ena tamiyami, nadigega Yaubada

^a 1:1 Yo 1:1-2, 4 ^b 1:1-2 Yo 1:14 ^c 1:5 1 Ti 6:16; Ye 1:17 ^d 1:6 1 Yo 2:4

nina sena maedana 'ena 'imiyami, nate taegosigosiyana 'ai'aila, manuna Natuna Yesu lalanega 'igie'esaseda 'ida to'umalinao maibo'adi 'ediyega.

⁸Ona'ai'aila, maibo'ada toto'umalida tuga, ta geya'abo takabokaboeda, be tagwae, “'Abo'agu bobo'agu, ta nige'ya 'igu to'umalinamo.” ⁹Ta esi 'eguma tasimana 'ai'ailli be tagwae, “O! Ni'atu yaloegesi,” Yaubada 'ida to'umalinao 'ida nuwataudi be 'enega 'igie'esasa 'ai'ailida, sawesawenaya be Yaubada tauna Topalupaluna taemise.

¹⁰Ona'ai'aila, 'eguma tagwae, “Nige'ya wate 'ebweu tuta yaloeloe'gesi,” nate Yaubada ta'awa'awa kabokaboe, manuna 'ina ona nige'ya taemiemise.

Keliso tauna 'ada tolema

2 ¹Ye natugwao, 'imi leta gete ya'etoladinawa be 'enega geya'abo waguiguinuwa gesi. Ta 'eguma taloe'gesi, Yesu Keliso tauna topalupaluna 'isisida manuda, Tamana 'enaya, ²be 'ida to'umalinao 'inuwataudi, manuna Yesu tauna 'italiyaena 'ida to'umalinao manudi, be wate me bale'u maibo'adi manudi.

³Yaubada nina tamwalatonina 'aene gosiya 'ai'ailida, 'eguma 'ina loinao taematamatedi. ⁴⁸Enega 'eguma yaita 'ionaona be 'igwae, “'Abo'agu Yaubada gosiyagu,” ta Yaubada 'ina loinao nige'ya 'ida ematamatedi, nate 'ikabokabo, manuna 'eda palupaluna 'ipilisinena. ⁵^hTa 'abo Yaubada 'ina ona tamulimuliye, 'ina oboboma 'enega 'iloemaeda be tamwalamwalatoni 'aene gosedai nina ma'eda tamiyami. ⁶ⁱEnega 'eguma yaita 'oyo 'ugwae, “'Abo'agu Yaubada gosiyagu ta ma'iyagu 'amiyami,” 'ilobwene 'ai'ailliyo be 'uda bubuna nadigega Yesu 'ina bubuna.

Loina auwauna

⁷^jGosegwao, geya'abo loina auwauna ya'eto'etoladinawa, ta esi loina kadekadelina nina wagimi nononaya, ga ni'atu wamwalatonina, gete yalolimenawa.

⁸^kTa esi loina gete ya'etoladi limena 'atuwa loina auwauna, oboboma manuna, manuna oboboma nina Keliso 'ana lobwene, ta 'omi 'ami lobwene wate. Nate 'enega guguyoi 'isawasawala, ta maedana 'ai'aila ni'atu 'isaema.

⁹^lEnega 'eguma yaita tasina 'ietalauwale be 'ionaona 'aene tauna maedana 'ena 'imiyami, nate 'ikabokabo, manuna tauna 'etamo tuga guguyoi 'ena 'imiyami. ¹⁰^mTa wate 'abo yaita 'oyo gosemwao

^c 2:1 Ib 9:24 ^f 2:2 Lo 3:25; Yo 1:29, 11:52 ^g 2:4 1 Yo 1:6, 8 ^h 2:5 Yo 14:21, 23;

1 Yo 4:12, 17, 5:3 ⁱ 2:6 Yo 13:15 ^j 2:7 2 Yo 5-6 ^k 2:8 Yo 1:9; Lo 13:12

^l 2:9 1 Yo 3:10, 15, 4:20 ^m 2:10 Lo 14:13

'uobobomedi, 'oyo maedana 'ena 'umiyami, 'enega geya'abo 'ube'ube'u.
 11 "Ta esi 'abo tasiyo 'uetalauwale, 'alena gete manuna 'oyo 'etamo guguyoi 'ina sena 'ena 'umiyami, ta wate guguyoi 'ena 'utautauya, be 'eda geya'abo 'u'ita'ita, manuna matayo guguyoi 'iumabodena.

12 °Gogama ye, ona gete ya'etoladinawa manuna 'imi loegesiyo
 Yaubada 'inuataudi, Yesu 'ana esanega.

13 'Ena'iyao ye, ona gete ya'etoladinawa manuna 'omi tauna lowaenei ga batuwa 'imiyami ni'atu wamwalamwalatoni.

Tubuwayao ye, ona gete ya'etoladinawa, manuna tauna toto'umalina sana ni'atu waewaiwai sinena.

Ta 'omi gogama sinasinabwami ona gete ya'etoladinawa, manuna Tamada ni'atu wamwalamwalatoni.

14 'Ena'iyao ye, ona gete ya'etoladinawa manuna 'omi tauna lowaenei ga batuwa 'imiyami ni'atu wamwalamwalatoni.

Tubuwayao ye, ona gete ya'etoladinawa, manuna 'omi toewaiwai sami ga Yaubada 'ina ona 'imiyami 'emiya, 'enega tauna toto'umalina sana ni'atu waewaiwai sinena.

15 °Gosegwao, geya'abo bale'u gete nuwami 'i'ewa'ewa, manuna 'eguma bale'u gwegwenao nuwami 'i'ewai, gete 'enega Tamadai wanuwa pupule, ta nigeya wada obobomena.

16 Ona'ai'aila, bale'u yagenao maibo'ana, nate yalakwaiya be gwegwe 'ana yala be nuwatu'e, yage getedi nigeya Tamada 'enega simeemai, ta esi bale'u 'enega. 17 °Ta bale'u gete 'iabe 'isasawala ta wate nuwanuwa gwegwe bale'u manuna 'igugumwala, ta 'abo'ada esi 'eguma Yaubada 'ina nuwanuwa taguiguinuwe tamiya ataya.

Keliso 'ana talauwala nina

18 °Natugwao, tuta 'ana 'ebe losalowa ni'atu 'imai saba, ta lowa wanonona 'aene Keliso 'ana talauwala nina 'iabe 'iapwesama, 'enega wada nuwa'i'isi Keliso 'ana talauwalao yaudi bale'uya simiyami, 'enega tamwalamwalatoni tuta 'ana 'ebe losalowa gete, 19 °ta Keliso 'ana talauwalao nidi 'adi 'ita 'atuwa Keliso 'ana toemisao, ta nigeya. Manuna taudi 'eguma 'ida boda 'ai'aila, 'etamo ma'edao tamiyami. Ta nigeya sa'i! Ni'atu sipilisineda.

20 Ta 'omi taudi nigeya nadigega, manuna ni'atu Yaluyaluwa Tabuna 'igiesinapumi, ga 'enega mwalatoi yauna wasinapudi, 21 ta nigeya 'aene ma imi emwagemwage 'imi leta gete wasawasawai, manuna e'ita palupaluna ni'atu wamwalamwalatoni, ta wate wasinapuna 'aene nigeya wate 'ebweu kabo 'iapweapwesama bubuna palupaluna 'enega.

° 2:11 Yo 12:35 ° 2:12 1 Ko 6:11 ° 2:15 Lo 8:7; Ye 4:4 ° 2:17 Md 7:21

° 2:18 Md 24:5, 24; 2 Yo 7 ° 2:19 Gu 20:30

22 "Ta taudi tokabo nidi Yesu sieyaseyaseye, ta sigwae, "Yesu tauna nigeya To'etoseyana." 'Abo yaisigedi sionaona nadigega, taudi Keliso 'ana talauwalao, manuna Keliso maTamana siguitoiyasedi.

23 "Enega 'eguma yaita 'oyo Yaubada Natuna 'uguito yasena, nigeya Yaubada ma'iyayo wamiyami. Ta esi 'eguma 'utagwaleyo Natuna 'enaya, tauna be Tamana ma'emwao wamiyami.

24 'Omi lowa tetelidi wanonona, 'enega 'abo tetela nina 'emiya 'imiyami tauna be Tamana ma'emiyao wamiyami, 25 "be yawasida nina 'iona upaupenaya 'ida 'ebwa'emi, nate yawasi ataya.

26 Gete maibo'ana ni'atu ya'etoladinawa be 'aene wada sinapu taudi 'ami tokaboyao manudi. 27 "Ta mwalatoi nina ni'atu wamwalatonina, manuna Yaubada Yaluyaluwana ni'atu 'i'ebwa'emi, ga ma'emi wamiyami, ta 'ie'itemi. 'Enega nigeya 'ebweu wate tai sawesawenaya be 'ie'itami, ta esi Yaubada 'ina 'ebwaya 'enega mwalatoi yauna wasinapuna, nate mwalatoi 'ai'aila manuna. Yaubada Yaluyaluwana nigeya sawesawenaya be 'ikaboeda. 'Enega 'ina e'itao wamuliyedi, be Keliso ma'emi wamiyami, ta geya'abo wapilipilisine.

Yaubada Natunao manudi

28 "Enega natugwao, 'ilobwenemi be Keliso 'ena wamiya ataya, 'enega 'abo tuta nina 'iapwesama, geya'abo ma imi matauta, nai ma imi omayamaya, ta esi wada gwausowala 'ina mai manuna.

29 "Ta Yaubada wate wada mwalatoni 'aene tauna Topalupaluna, 'enega 'abo yaisigedi taudi siguinuwa palupaluna, taudi Yaubada 'enega situbuwama.

3 1 "Abo'ada 'eguma Yaubada 'enega tatubuwa, tauna 'ida 'awanatuneda. Gete 'ina oboboma sinabwa wawasae manuda. Ona'ai'aila, me bale'u Yaubada nigeya simwalamwalatoni, 'enega me bale'u geya'abo si'ina'inateda 'aene 'abo'ada Yaubada natunao. 2 "Gosegwao, gete tuga Yaubada 'i'awanatuneda be ma'etamo to'ase 'iapwesa 'edaya? Nate namo tamwalamwalatoni 'aene 'ina ilalimanama 'enaya 'ana 'ita tauna tada 'ita, ta 'abo'ada 'ada 'ita 'iesa'u gelasedi be tauna nadigega.

3 'Ida emisa yage gete manuna 'enega 'ida bubuna tagie'esasedi, nadigega Keliso.

4 Ta esi toto'umalidi Yaubada 'ina lolina sile'oale'oa, nate bubuna to'umalina. 5 "Ta wate tamwalamwalatoni 'aene Keliso nina 'imai 'ida bubuna to'umalidi sabi 'ewayauledi, ta tauna nigeya 'ebweu wate 'ina

† 2:22 Md 10:32-33; 1 Yo 4:3; 2 Yo 7 " 2:23 Md 10:32-33; Yo 5:23; 2 Yo 9 " 2:25 Yo 3:15, 6:40 " 2:27 Yo 14:26 x 2:28 1 Yo 4:17 y 2:29 1 Yo 3:10 z 3:1 Yo 1:12-13, 16:3
a 3:2 2 Ko 3:18; Pi 3:21 b 3:5 2 Ko 5:21; 1 Pi 2:22-24

to'umalinamo. ^{6c}Enega 'eguma 'abo'ada Keliso ma'edai tamiyami geya'abo wate tabuubuna to'umalina, ta esi taudi toto'umalidi nige ya Keliso si'ita'ita, ta wate nige ya simwalamwalatoni.

^{7d}Natugwao, geya'abo e'ita kabokabo wamulimuliye, ta esi nuwami sida sabwalena 'aene 'abo yaisigedi taudi 'idi bubuna bobo'ana, taudi nate tobobo'adi, nadigega Keliso. ^{8e}Ta toto'umalidi nate taudi Seitani 'ina bodao, manuna gimituta 'enega ga batuwa Seitani tauna toto'umalina. 'Enega Yaubada Natuna 'ietunena ga bale'uya 'imai Seitani 'ina guinu wao sabi 'ausepaledi. ^{9f}Enega wate 'eguma Yaubada 'enega tatubuwama geya'abo taguiguinuwa to'umalina, manuna bubuna auwauna 'atedaya ni'atu 'isa'una, 'enega 'abo'ada Yaubada natunao nige ya sawesawenaya be to'umalina wate taguinuwe.

¹⁰Enega taudi ta'inatedi 'aene yaisigedi Yaubada natunao, ta yaisigedi Seitani 'ina bodao, manuna taudi Seitani 'ina boda geya'abo sa'i siguiguinuwa palupalu, manuna nige ya situbutubuwama Yaubada 'enega, ta wate geya'abo sieobooboboma matasidiyao.

Oboboma gosedao 'ediya

^{11g}Emataluwa sinabwana gete 'agimi eonemi 'aene gosedao maibo'adi tada obobomedi. ^{12h}Ta geya'abo Keni nadigega, manuna Keni nina Seitani 'ina boda, ga tasina 'iununa. Ta 'ina loemwamasa 'alena tuga e'ipi'ipi, manuna tasina 'ina guinuwa bobo'ana ta Keni nina 'ina guinuwa to'umalina. ¹³ⁱEnega tasigwao, geya'abo wanuwanuwa owana 'abo me bale'u sietalauwaleda. ^{14j}Ta tamwalamwalatoni 'aene mwawasa 'ina sena ni'atu taebesinena, manuna 'atedega gosedao taoboobobomedi, ga yawasida ataya ni'atu talobena. Ta 'eguma yaisigedi taudi nige ya oboboma 'atediya, taudi tuga ma'etamo mwawasa 'ina sena 'ena simiyami. ^{15k}Ona'ai'aila, 'eguma yaita tasina 'ietalauwale, tauna toloemwawasa tuga, ta wamwalamwalatoni 'aene geya'abo taudi toloemwawasa nidi yawasidi ataya silobaloba. ^{16l}Ta wate oboboma tamwalatonina, nate 'aene Keliso yawasina 'itagwalena ga manuda 'imwawasa, 'enega 'ilobweneda wate be yawasida tatagwale tasidao manudi.

^{17m}Wada nuwa'i'isi 'aene 'eguma yaita toesaesa 'imiyami, ta gosiyana 'ebweu 'imiyamwau, be 'eguma nige ya 'ebweu wate lema 'i'ebwa'ebwa'e, mwa'adega Yaubada 'ina oboboma 'atenaya? Nige ya.

¹⁸Natugwao, geya'abo 'ida oboboma ona namo 'enega, ta esi 'ida guinuwe ga be tada oboboma 'ai'aila.

^c 3:6 Lo 6:1-2; ¹⁴ ^d 3:7 1 Yo 2:29 ^e 3:8 Yo 8:44 ^f 3:9 1 Yo 5:18 ^g 3:11 Yo 13:34-35

^h 3:12 Nug 4:8 ⁱ 3:13 Yo 15:18-19; Md 5:11-12 ^j 3:14 1 Yo 2:11 ^k 3:15 Md 5:21-22

^l 3:16 Yo 13:1; 1 Te 2:8 ^m 3:17-18 2 Loi 15:7; Ye 2:15-16

Geya'abo tamatamatauta Yaubada matanaya

¹⁹Eguma 'ida guinuwega taeobooboboma, gete 'ena tamwalamwalatoni 'aene e'ita 'ai'aila 'ena tamiyami, be geya'abo tamatamatauta Yaubada matanaya. ²⁰Ta 'eguma ma ida 'atesa'ala 'aene 'abo'ada toto'umalida, Yaubada 'atesa'ala nidi 'ida kweudi, manuna yage yauna sawesawenaya, ta wate mwalatoi maibo'ana 'isinapudi.

²¹Gosegwao, 'eguma nige'ya 'ida 'ebe 'atesa'alamo, kapekapeyana be ta'atepatu Yaubada matanaya, ²²"be 'abo to'ase taside 'enaya 'ida 'ebwa'eda, manuna tauna 'ina loinao taematamatedi, ta 'ida guinu'wao manudi 'ig'wausowala. ²³"Ta 'ina loina 'eluwa nidi 'aene Natuna Yesu Keliso taemise, be goseda' taobobomedi, nadigega Keliso nina 'ada loina 'i'ebwa'eda.

²⁴^PEnega 'eguma 'ina loinao tamulimuliyedi, 'abo'ada 'enaya tamiyami, ta tauna 'eday' 'imiyami. Ta mwa'adega 'ina miya 'eday' tamwalatoi'ese? Manuna Yaluyaluwana 'i'ebwa'eda, ga 'eday' 'imiyami.

Keliso 'ana talauwala yaluyaluwa to'umalidi

4 ¹Gosegwao, geya'abo yaluyaluwa maibo'adi waemiemisedi, ta esi watoodi, bobo'adi nai to'umalidi. 'Eguma taudi bobo'adi, tamwalatonidi 'aene Yaubada 'enega simai, ta taudi to'umalidi mali senega simai, manuna gete tuga palopita kabokaboyao siapweapwesama mayaluyaluwadi nige'ya Yaubada 'enega. ²"Ta esi Yaubada Yaluyaluwana wada mwalatoni 'aene 'eguma Yesu Keliso ta'awa'ai'aile 'aene 'ietomotai bale'uya, 'ida ona nidi nate Yaubada Yaluyaluwana 'enega. ³"Ta esi yaluyaluwa nidi 'abo Yesu sieyaseyaseyena, taudi nige'ya Yaubada 'enega, ta esi Keliso 'ana talauwala yaluyaluwana 'enega, ta talauwala nina 'ina mai 'alena lowa wanonona, ta ona'ai'aila, gete tuga bada bale'uya 'imiyami.

⁴Natugwao, 'omi Yaubada 'enega watubuwama, 'enega mali yaluyaluwa nidi ni'atu waewaiwai sinedi, manuna Yaluyaluwa nina 'eday' 'imiyami Toewaiwai sana, ta yaluyaluwa nina me bale'u 'ediya 'imiyami 'ina waiwai nige'ya sinabwana.

⁵"Ta taudi me bale'u bubuna bale'u manuna sionaona, 'enega me bale'u yaudi 'enadi sinonona.

⁶"Ta 'abo'ada esi Yaubada 'enega tatubuwama, 'enega 'abo yaisigedi taudi Yaubada 'ana tomwalatoi'ao 'enada sinonona, ta taudi nige'ya Yaubada simwalamwalatoni 'enada geya'abo sinonona. 'Enega tamwalatonina 'aene yaluyaluwa kabokabona 'ediya 'imiyami, manuna 'eguma yaluyaluwa 'ai'aila 'ediya 'imiyami 'enada sida nono.

" 3:22 Md 21:22 ° 3:23 Yo 6:29, 13:34 P 3:24 Lo 8:9 ° 4:1 Md 24:11 ° 4:2 1 Ko 12:3
 ° 4:3 2 Yo 7 ° 4:5 Yo 15:19 ° 4:6 Yo 8:47

Yaubada oboboma 'alena

⁷Gosegwao, maibo'ada tada eoboobobomeda, manuna Yaubada oboboma 'alena, 'enega toobobomao taudi ni'atu Yaubada 'ienatunedi, ta taudi Yaubada 'ana tomwalatoyao. ⁸Ta esi taudi nigeya tooboboma, taudi nigeya Yaubada 'ana tomwalatoyao, manuna Yaubada oboboma 'alena, ⁹'ga 'ina oboboma 'igieapwesena 'edaya Natuna 'enega, manuna Natuna tebweuna nina 'ietunenama, ga bale'uya 'imai, be 'aene yawasi 'ai'aila 'i'ebwa'eda.

¹⁰^wGete oboboma 'ai'aila, nigeya 'aene 'abo'ada Yaubada 'ana toobobomao, ta Yaubada esi 'ada tooboboma, ga Natuna 'itagwalena be 'italiyaena tauna 'ida loegesiyao manudi. ¹¹^xGote 'ena Yaubada 'ina oboboma 'edaya 'isinabwa wawasae. 'Enega gosegwao, 'ilobweneda be tauda tada eoboobobomeda.

¹²^yNigeya 'ebweu tuta me bale'u Yaubada sida 'itena, ta 'abo'ada esi 'ida eoboobobomega tauda 'ebweuna 'ebweuna 'enaya nate 'enega Yaubada nina ma'edai, ta wate 'ina oboboma 'ai'aila 'atedaya 'imiyami. ¹³^zTa wate tamwalatonina 'aene 'abo'ada 'enaya ta tauna 'edaya, manuna yaluyaluwana ni'atu 'i'ebwa'eda.

¹⁴^aTa 'abo'ama matamega Yaubada Natuna 'a'itena, ga manuna 'asimasimana 'aene Tamana bale'uya 'ietunenama 'aene 'ada To'etoseyana.

¹⁵'Enega 'eguma yaita 'oyo 'u'awa'ai'aila 'aene Yesu tauna Yaubada Natuna, Yaubada 'emuya 'imiyami ta yawasiyo tauna 'enaya.

¹⁶^b'Enega Yaubada 'ina oboboma 'edaya ni'atu tamwalatonina ga ta'awa 'ai'ailena.

Ona'ai'aila, Yaubada oboboma 'alena, 'enega 'abo yaita oboboma 'ina sena 'ena 'imiyami, tauna Yaubada 'ena 'imiyami, ta Yaubada sa'i tauna wate 'enaya 'imiyami.

¹⁷Gete 'enega taeobooboboma 'ai'aila be bwa'omatana 'ana 'asiyata 'enaya geyal'abo tamatamatauta, ta esi tada 'atepatu, manuna tuta gete bale'uya tamiyami 'abo'ada Keliso nadigega. ¹⁸Ta 'ida oboboma nina 'enega geyal'abo tamatamatauta, manuna oboboma 'ai'aila matauta 'i'ewa yaulena. Ona'ai'aila, lolina 'ena tamatauta, 'eguma eobooboboma 'ai'aila nigeya 'edaya.

¹⁹^cTa 'ida oboboma nina 'alena gete manuna Yaubada 'igimi obobomeda.

²⁰'Eguma yaita 'igwae, "Yaubada yaobobomena," ta 'abo tai nina tasina 'ietalauwale, tauna tokabo, manuna tasidai ta'ita'ita, 'enega 'abo tasidai

^v 4:9 Yo 3:16 ^w 4:10 Lo 5:8-10 ^x 4:11 Md 18:33 ^y 4:12 Yo 1:18 ^z 4:13 2 Ko 1:21-22

^a 4:14 Yo 3:17 ^b 4:16 Yo 6:69 ^c 4:19 1 Yo 4:10

nigeya taobobobome, nigeya sawesawedaya be Yaubada taobobome, tauna nigeya tada 'itena.

^{21 d}Ta 'ada lolina Yaubada 'enega be 'aene tauna taobobome, ta wate tasidao taobobomedi.

Yesu 'ana emisa 'iewaiwai bubuna bale'u 'enaya

5 ¹Eguma maibo'ada Yesu taemise 'aene tauna To'etoseyana, 'abo'ada Yaubada natunao. Ta wate 'eguma Tamana taobobome, natunao nadigega taobobomedi. ²'Enega 'eguma Yaubada taobobome, ta 'eguma 'ina lolinao taematamatanedi, tamwalamwalatoni 'aene Yaubada natunao wate taobobomedi. ^{3 e}Manuna Yaubada 'ana oboboma be 'ina lolina 'ana ematamatana leleleya, ta 'ina lolina nidi nigeya mwaudi, ta esi kapekapeyadi. ^{4 f}Enega 'eguma Yaubada 'ienatuneda, bubuna bale'u taewaiwai sine, ta 'ida 'ebe ewaiwai nina 'ana esana emisa. ^{5 g}Manuna 'abo Yesu taemise 'aene Yaubada Natuna, gete 'enega bubuna bale'u taewaiwai sine.

Yaubada Natuna 'ana simana manuna

^{6 h}Ta Natuna 'ina mai 'edaya nate bwasiyega ta wate lalanega, tauna Yesu Keliso, nigeya bwasi namo 'enega, ta esi bwasi be lala wate 'ediyege. Gete manuna Yaubada Yaluyaluwana 'isimasimana 'ai'aila manuna Yaluyaluwana adelina palupaluna. ^{7 i}Manuna Yesu 'ana tosimanao 'etoi simiyami, ^{8 j}nate Yaluyaluwa ta bwasi ta lala, ta 'idi e'ita leleleya.

^{9 k}Eguma tomota 'idi simanao taemisedi, sawesawenaya be Yaubada 'ina simana taemise, manuna Yaubada tauna Toewaiwai, ga Natuna manuna 'isimana 'edaya. ^{10 l}Enega 'eguma tauna taemise, 'atedaya talotoo 'aene tauna Yaubada Natuna. Ta esi 'eguma Yaubada geya'abo taemiemise, gote 'enega ta'awa kabokaboe, manuna 'ina simana Natuna manuna nigeya taemiemise. ^{11 m}Ta 'ina simana nina 'aene Natunana 'enega yawasida ataya 'i'ebwa'eda. ^{12 n}Enega 'abo yaita Yaubada Natuna 'enaya 'imiyami, tai nina yawasina bobo'ana ni'atu 'ilobena, ta 'abo yaita nigeya Yaubada Natuna 'enaya, tauna nigeya.

Yawasi ataya manuna

^{13 m}Imi leta gete ni'atu ya'etoladinawa be wamwalamwalatoni 'aene 'eguma Yaubada Natuna 'ana esanega waemiemisa, yawasimi ataya waloba, ^{14 n}be wate matanaya 'ada lotoona 'aene 'ida sidasida 'inonodi, be 'i'ebwa'eda to'ase be to'ase tasidasida manudi, 'abo tauna 'ina nuwena

^d 4:21 Md 5:44-45; Mk 12:29-31 ^e 5:3 Yo 14:15, 23-24; Md 11:30 ^f 5:4 Yo 16:33

^g 5:5 Lo 8:37 ^h 5:6 Yo 1:29-34 ⁱ 5:7 Yo 15:26 ^j 5:9 Yo 5:32-37, 8:18 ^k 5:10 Ga 4:6

^l 5:12 Yo 3:36 ^m 5:13 Yo 20:31 ⁿ 5:14 Yo 14:13

wate nadigega. ¹⁵Ona'ai'aila, 'ida sidao maibo'adi 'inonodi, 'enega tamwalatonina 'aene 'ida sidao nidi 'ie'isedi.

¹⁶^oAina loegesi 'adi e'isa mwawasa ta 'aidi nigeya, 'enega 'eguma yaita 'oyo tasiyo 'u'ita 'iloegesi, ta loegesi nina gidalina ta nigeya 'ana e'isa mwawasa, 'enega 'eguma toloegesi nina manuna 'usisida Yaubada 'enaya, Yaubada 'imu sida 'ida nono, be tasiyo yawasina 'ida tagwale. Ta esi loegesi nidi 'adi e'isa mwawasa, geya'abo manudi wasidasida Yaubada 'enaya. ¹⁷Ona'ai'aila, loegesi maibo'adi to'umalidi, ta 'aidi 'adi e'isa nigeya mwawasa.

¹⁸^pTa esi tamwalamwalatoni 'aene 'abo Yaubada 'ienatuneda geya'abo taloeloegesi, manuna tauna Yaubada 'igimi enatunenaya 'i'ita'isida, be geya'abo tauna toto'umalina nina 'igitogitooda.

¹⁹Ta wate 'abo'ada tamwalamwalatoni 'aene Yaubada 'ienatuneda, ta sa'i bale'u bubunina 'ana tomuliyao yauyaudi toto'umalina nina 'ina bodao.

²⁰^qTa wate tamwalamwalatoni 'aene Yaubada Natuna ni'atu 'imai 'edaya, ga 'igienuwa sabwalenida 'aene Yaubada Topalupaluna, ta 'enaya tamiyami, manuna 'abo'ada Yaubada Natuna Yesu Keliso ma'eda. Yesu nina Yaubada 'ai'aila, ta yawasida ataya 'alena.

²¹^rNatugwao, wada 'ita'isimi mali 'ebe emisao 'ediyega, be wapilisinedi.